

Joibe 13 S. Zuan	Domenie 16 S. S. Corneli e Ciprian	Miercus 19 S. Zenâr	Il proverbi Cul fâ ben a chei altris tu fasis ben par te.	Il soreli Ai 19 al jeve aes 6.50 e al va a mont aes 19.11.
Vinars 14 La Sante Crôs	Lunis 17 Stigmatis di S. Francesc	Il timp Cun la Sierade e rivin ancje plois e fresc.	Lis voris dal mès In chest mès si cjapin sù i ultins pomodoros: a son chei plui gustôs.	La lune Ai 17 prin cuart.
Sabide 15 La Madone dolorade	Martars 18 S. Josef di Cupertin			



lis GNOVIS

FAMEE «DOC» Lion in fieste par Fiore Jacuzzi



Ancje il Fogolâr di Lion al à volût festezâ Fiore Jacuzzi, «il Nini», cuant che al à finît 90 agns. Di chê strade, al à podût onorâ dute la famee dai Jacus e rifleti su la tipicitât des fameis furlanis. «La mari di Fiore e jere furlane, che ben si intint – al conte il president dal Fogolâr, Danilo Vezzio –, ma nassude a Armstrong, Santa Fe, Argentine. Il so om, furlan ancje lui, lu à cognossût in France, cuant che a vevin scugnût bandonâ la Americhe ti biade dai çupets, che a vevin fiscât lis campagne par doi agns di file». Il «Nini» al è nassût dal 1928 te periferie industriâl di Lion. So pari, natif di Possec di Bertiuâl, al jere restât cuet par colpe de prime vuere mondiâl, combatude cul esercit talian; naturalizât francès i à tocjât di fâ ancje la seconde vuere mondiâl. L'esercit francès i passave la scarpe ortopediche pal pît ferît e chê altre al scugnive paiâse di bessôl. Fiore al à cognossût la sô femine, Eliane Di Giusto, intant di une gnoce a Gnespolêt. Ancje jê e jere furlane, naturâl, ma nassude in France di gjenitôrs di Trep, implantâts in Alsazie e po stralozâts a Lion. In zornade di vuê, a la barbe dai 90 Carnevâi, Fiore Jacuzzi si divertis zuiant di golf.

MARCJÂT CONTADIN A Cjamp, cul «Ecomuseu»

Domenie ai 9 di Setembar, al à tornât a vierzi il Marcjât contadin di Cjamp, par cure dal «Ecomuseo delle Acque» (www.ecomuseo-delleacque.it) e dal Circul culturâl ricreatif. Al funzionerà, li da «La Frasca», ogni prime domenie dal mès, di 9 a 13. Si podarà comprâ, sore il dut, prodots des aziendis agriculâs dal Glemonat. Par screâ la gnove anade, a son stâts presentâts 4 «Presidi Slow Food»: il «Pan di sorc», il Formadi de Latarie di Cjamp, l'ai di Resie e i fasûi di San Quarin. Cun di plui, e je stade invidade la aziende «Zore» di Platisçj, cui siei formadis di lat di cjare.

Dai 19 ai 22 di Setembar, il prin percors formatîf intensîf



La prime edizion di «Sibec Lab» e je programade in provincie di Pistoie.

Governâ i Bens comuns

CUATRI DÏS di lezioni, cun cuatri insegnants navigâts, par vincj arlêfs, che a varan di proponi vincj progjets di analizâ, di perfezionâ e di presentâ a un zuri specializât. In struc, «Sibec Lab», il prin «Campus» intensif par imparâ la gjestion condividue dai Bens comuns, al sarâ propit cussî.

Il laboratori, ideât di «Euricse» (la fondazion di ricercje pe inovazion des cooperativis e des impresis sociâls «European Research Institute on Cooperative and Social Enterprises»; www.impresasociale.info/it) e di «Labsus» (il «Laboratori pe sussidiarietà», che al à elaborât i «Regolamenti per l'amministrazione condivisa», in zornade di vuê adotâts in passe 150 Comuns talians; www.labsus.org), cun «Dynamo Academy» e cul jutori di «Banca Etica», al sarâ programât dai 19 ai 22 di Setembar, li de «Oasy Dynamo», a San Marcello Piteglio, te provincie di Pistoie.

I arlêfs – aminstradôrs, imprenditôrs, professioniscj, quartevôs di clapis za impegnadis te promozion e te gjestion dai Bens comuns, ma ancje citadins atîfs – a àn podût dâsi in note fintremai ai 10 di Setembar.

Il progjet al è nassût de con-

vinzion che la rigenerazion dai Bens comuns e je necessarie par dâur un avignî a tancj patrimoni publicis, dismenteâts, bandonâts o aminstrâts malementri, e par fâ in mût che a tornin a diventâ un servizi prezios pes Comunitâts.

«Parcs, edificis, palaçs: la note e sarès lungjone – a disin i organizzadôrs di «Sibec Lab» –. A son spazis e ambients publicis che vuê a pericolin di restâ bandonâts o doprâts masse pôc, ancje par colpe de riduzion progressive des risorsis disponibilis.

Tant e tant, il resuriment di chescj patrimoni dismenteâts, mediant di une gjestion condividue, al è pardabon pussibil; anzit, di tantis bandis, al è bielzà començât. Ma par otignî un recupar vèr di chescj Bens a coventin competencis e abilitâts di pueste.

La fonde politiche e juridiche de «Amministrazione condividue» al è il «Principi di Sussidiarietà orizzontâl», jentrât te Costituzione de Republiche taliane in grazie de riforme costituzionâl dal 2001 che, alfin, e à ricognossût che «Stât, Regions, Citâts metropolitanis, Provincis e Comuns a favorissin la iniziative autonome dai citadins, di bessôi o associâts, cuant che a davuelzin ativitâts di interes gjenerâl» (articul 118).

Il «Campus» di chest an al

slarge la propueste formative bielzà inviade di «Sibec», la «Scuola Italiana Beni Comuni» (www.sibec.eu), che e je stade screade vie pe Sierade dal 2015 di «Euricse», di «Labsus» e de Università di Trent.

Il fin de Scuele dai Bens comuns al è chel di specializâ i funzionaris dai Ents locâi, par che a sedin in stât di colaborâ in mût positif cui citadins atîfs par svilupâ la amministrazion condividue te curie dai Bens comuns, tant chei materiâi che chei no materiâi, e une schirie di professioniscj gnûfs, par che a sedin bogns di gjestî in formis economicis sostenibilis i Bens comuns, creant oportunitâts di svilup e di benstâ pes Comunitâts interessadis.

In plui dai cors itinerants (chei dal 2018 a son stâts proponûts a Cosenza, Palermo, Milan e Bologna), «Sibec Lab» al à decidût di inviâ la formule dal per-

cors intensif, par dâur snait e fiabilitât a progjets positifis, cul jutori di «tutor» esperts e cun lezioni che a ufrissin competencis teorichis e praticis par gjestî i Bens comuns (de ricercje dai finanziaments al «management» quotidian, a lis strategiis par presentâsi e par presentâ un progjet).

«Euricse» e «Labsus» a son persuadûts che «chel dal Gjestôr dai Bens comuns al è un profil professionâl gnûf, dulà che lis cualitâts di «leadership» a àn di cumbinâsi cun abilitâts relazionâls e di mediazion e dulà che lis competencis tecnicis e progjetuâls a scuegnin restâ simpri leadis cu lis necessitâts e cu lis risorsis de Comunitât. Chest profil professionâl gnûf – a marchin i doi ents promotôrs – al covente tant tes amministrazioni publicis che tes impresis privadis, chês for profit e chês nonprofit».

MARIO ZILI

Par promovi la lenghe, volontariât culturâl

Dal mès di Setembar al mès di Dicembar la agenzie regionâl «AR-LeF» (www.arlef.it) e imbastissarà un bancut par presentâ lis sôs ativitâts di promozion de marilenghe intant des manifestazions «Friuli Doc» (a Udin, dai 13 ai 16 di Setembar); «Zornade Europeane des Lenghis», ai 26 di Setembar; «Gusti di Frontiera» (a Gurize, ai 29 e ai 30 di Setembar); e «Suns Europe» (a Udin, il 1 e ai 2 di Dicembar). Di chê strade, a saran ingaiâts 10 voluntaris, fra 18 e 40 agns, sielzûts i prins dîs di chest mès.

PERAULIS in DISMENTIE

• par cure di MARIO MARTINIS •

VUAITE

s.f. = agguato; appostamento
(dal francone wachta "sentinella")
Sêstu in vuaite cun cheste criûre?
Fai l'appostamento con questo freddo intenso?

VUALÎF

agg. = piano, liscio, senza scabrosità
(forma continuatrice del latino aequalis "uguale" in riferimento alla superficie)
E je une tele fine e vualive.
È una tela fine e liscia.

VUALMÂ

v. = adocchiare, fissare
(forma nata probabilmente dall'incontro di calumâ, dal latino ecce e allumare, e di olmâ "adocchiare", dal latino parlato *usmare, a sua volta dal greco osmao "io fiuto", da osme "odore")
Cui sa ce che o ai fat par fâmi vualmâ di Martin dut il timp dal spettacul.
Chissa che cosa ho fatto per farmi fissare da Martino tutto il tempo dello spettacolo.

VUATE

s.f. = insidia, trappola, rete, agguato
(dal longobardo wada "una sorta di rete")
Dami di buride la vuate che sot il clap e je une trute.
Dammi subito la rete perché sotto il sasso c'è una trota.

VUEIT

agg. = vuoto
(dal latino volgare vocitus, a sua volta da vocere, per vacere "essere vuoto")
Il bocâl al è vueit, Tonie jemplilu di un bon refosc.
Il boccale è vuoto, Antonia riempilo di un buon refosco.

VIUSCJE

s.f. = bacchetta sottile, verga
(da viscia "pania", se non è onomatopeica, continua il latino viscum "vischio")
La vuiscje no plâs a di nissun.
La bacchetta non piace a nessuno.